

中國近代文學叢書

上海古籍出版社

越縵堂詩文集

中

李慈銘 著

劉再華 校點

中國近代文學叢書

上海古籍出版社



越縵堂詩文集

中

李慈銘 著

劉再華 校點

追題游東關天花寺詩 有序

放翁《老學庵筆記》云：「會稽鏡湖之東，地名東關，有天花寺。呂文靖嘗題詩云：『賀家湖上天花寺，一一軒窗向水開。不用閉門防俗客，愛閑能有幾人來？』今寺乃在草市通衢中，三面皆民間廬舍，前臨一支港，與詩不合，豈陵谷之變遽已如此？或謂寺本在湖中，後徙於此。」《嘉太會稽志》所言略同。余於戊辰之冬嘗一過之，寺門閑靜，近依水曲，旁絕塵市，亦遠衢街，與白塔洋尚隔里餘，疑無湖中移置之理。至賀家湖者，今日賀家池，在樊浦東，離寺甚遠。呂公北人，故不深知也。然其詩境佳絕。近久客都下，烟水夢深，彷彿曩觀，補題長句。

廿年前櫂入東舟，曾向天花寺裏游。市轉碧橋開靜野，牆欹紅樹照寒流。四圍稻葉常遮屋，一院松風自繞樓。誰向招提問興廢。山門長占鏡湖秋。東關白塔洋長三里餘，是鏡湖之僅存者。

書先莊簡公千巖亭詩後 有序

先莊簡公紹興中罷相，以提舉洞霄宮還居郡城新河。嘗過陸少師宰千巖亭，賦詩云：

「家山好處尋難遍，日日當門只臥龍。欲盡東南巖壑美，須來亭上小從容。」慈銘平生喜誦此詩。乙丑還里，賃廡新河者兩載，後移寓錦鱗橋，則臥龍日在戶聞矣。比年久羈郎署，極念故山，甲申歲闌，寒夜多思，謹題五言一章於後，述祖德，志息壤焉。

我祖南宋英，罷政守鄉郡。遂安新河居，千載想餘韻。同時陸祕閣，始築千巖亭。放翁尚童草，授詩聞過庭。時見相公來，青山在眉宇。白雲不可贈，相招白雲語。藤州忽赴謫，遂落瓊海邊。仙山一家樂，事見《雲谷雜記》。化鶴無歸年。至今清風生，近接水澄巷。第宅多新開，市樓絕霞絳。余也一廬賃，兩見河水春。時尋古松石，想見峨冠人。龜堂久已平，快閣亦非故，只道三山間，猶有東園樹。薄宦去鄉國，欲歸無寸田。何從乞祠祿，況求一郡便。寒夜靜煮茶，凍窗聞竹折。夢載梅花艣，探遍山陰雪。猿鶴蕙帷寒，峯峯積翠間。翻思錦鱗里，隱几臥龍山。

甲申生日書玉敦夫介唐三編修光甫戶部攜酒見過夜張燈召樂與
諸君飲即席賦呈

修幹無恒期，況復百憂集。侵尋迫崦嵫，生事無一立。幸有君子交，素業欣所習。偏

念縣弧辰，趺然會車笠。玉缸樺燭明，玳筵蕙鑪襲。雙花行金尊，細樂綴笙什。平生苦鮮歡，視蔭每汲汲。吾降逼歲闌，人事尤屢屐。謀此頃刻娛，懼有鬼神竦。頗聞北戶下，臘鼓催戰急。傳烽及甘泉，四海驚滄漭。戴面朝登壇，帖耳夕就輦。稟街虛郅支，葛亮盡帶汁。卅里明光甲，無由買酋級。詭道詐捷書，踰限斷履輟。終南未爲工，柱下此可執。諸君在承明，耐寒不肯翕。雅尚如填鰭，湛冥共鄉邑。相勸一尊醉，毋效耳語耳。十笏茅堂寬，梅花沍烟濕。酒香燈四圍，風雪豈能及。翠袖手可溫，青山夢先入。萬物翹春蘇，吾學蟄蟲蟄。

甲申除夕懷雲門宜川却寄

龍門西去控三秦，獨擁山城爆竹春。那有梅花通驛使，喜添柏葉頌閨人。縣朝法酒三正樂，官閣香匳百福巾。知爾今宵能念我，歲盤燈照髮如銀。

乙酉元日走筆調同年翰林諸公

以下乙酉

興慶千行族內家，九華燈映紫宸霞。頗聞鈞樂天街徹，已見東風御柳斜。立仗豈須西

極馬，隨班不及上林鴉。要知奉敕邨梅格，宮體何曾學杏花。

乙酉人日追感去年與荇老用杜少陵高常侍韻唱酬之作柬益吾

祭酒

甲申人日草堂前，曾繼梅花唱和篇。猶有流風推老輩，豈知逝水隔今年。雪消綠到三湘澤，燈動紅飛九陌天。所幸胡盧傳漢史，琅嬛金管待新編。

荇老著《漢書注校補》，甫刻成而歿。

祭酒近著《漢書補注》，多采其說。

書徐星伯太守唐登科記考後五十韻

唐代重進士，風華冠諸科。崔氏姚康遞有述，洪适樂史重編摩。書佚見它說，文獻勤搜羅。《文獻通考》尚載《登科記》大略，始武德，終周顯德。每年先列進士幾人，次列諸科幾人，蓋即樂史本，徐

氏據以爲目。時代若魚貫，雁塔劫不磨。綾紅雪作餡，袍綠花成窠。萬口熟辭賦，名箋誇姪

娥。杏花一榜出，千門走驄驪。團司傳鯖單，期集占錦窩。百舫曲江列，十隊明珠馱。至尊御樓觀，公卿萃鳴珂。盛事滿史冊，秉筆不敢苛。梁房玄齡萊杜如晦及甫白，此中皆誰

何？高唐出章奏，鄴侯自潤邁。中晚三大儒，杜佑李吉甫，鄭覃則那。那，猶然也。那，然，一聲之轉。《左傳》：「棄甲則那。」謂牛、犀兕之皮可爲甲者尚多，雖棄無害，故棄甲則然也。其下役夫曰：「從其有皮，丹漆若何？」謂皮縱有之如丹漆，何也？其應答之情如繪。杜注：「那，何也。是華元自謂棄甲則何矣？」上下文語氣皆乖。昌黎《石鼓歌》：「繼周八代爭戰罷，無人收拾理則那。方今太平日無事，柄任儒術崇丘軻。」謂自漢至隋，疲於爭戰，無人收拾石鼓，理則然也。是昌黎之解不誤。通典郡縣志，絕業無能過。石經創今體，古澤追象獻。出身皆任子，未嘗炫隨和。趙公傳衛國，相業凌嵯峨。咸非隨計吏，起家持橐荷。豈屑爭舖席，叉手相吟哦。湜崔琬達奚闢劉璨柳輩，國賊聯金坡。宗閔詡玉筍，朋黨成疴痾。三魁張又新，八關帥羣魔。狀元或覆落，曳白紛縷覲。瑣瑣等點鬼，錄錄付逝波。文字率回冗，十九傳謬訛。月露一二語，尊之比蚪蚪。二甲門關節，兩軍樹媒囹。所以贊皇公，輕薄苦詆訶。俗溺不易曉，肉食趨嬖媮。天子假鄉貢，上下公欺訛。冬集祇溫卷，夏課惟奔梭。恩地比夫婿，新粧競眉蛾。但求捷足得，不顧駢顏酡。乾寧一詔黜，白徒天敢呵。蘇楷改廟謚，李振擁賊靴。山甫報晉國，竟剽全家戈。日落梟鏡集，鼎沉螭罔多。濫觴始團雪，流極沉陵阿。尚傳文皇智，賺此英雄皤。豪禿萬山兔，墨傾千斛螺。留與作佳話，聊比曳落河。主司冬烘客，郎君春夢婆。豈無名世英，由此假斧柯。龍額點魴鯉，鳳翼傳駟鵝。

明堂貢璆玉，朱簠升嘉禾。美哉唐桂林，遠嬾周菁莪。非若晚近賤，浮名抵漁蓑。摩挲千佛經，歎豔霓裳歌。盛衰有倚伏，此理終不頗。

【校記】

「叉手」原形誤作「义手」，因徑改。按，詩用《北夢瑣言》卷四溫庭筠「才思豔麗」，押官韻作賦，「凡八叉手而八韻成」典，故改。「梟鏡集」國稿本、越鐸本均作「梟鏡集」，義同。按，「梟鏡」語本《史記·武帝紀》：「祠黃帝用一梟、破鏡。」《集解》引孟康云：「梟，鳥名，食母。破鏡，獸名，食父。」鏡亦作「獍」，見唐人石刻《姜行本碑》、《張琮碑》等。（參清鄭業敦《獨笑齋金石文考殘稿》所載）

乙酉都門觀燈口號四首

昨趁元宵入鳳城，九衢惟有月華明。尚書六省都如水，偶見提燈老吏行。
負弩腰刀一字排，金吾憑堞點兵來。重闌闐寂無車馬，虛說銀橋放夜開。
市樓指點管弦升，間有銀花簇采絢。知雜不來京尹睡，材官呵殿過雙燈。
扶路看燈遍市廛，車馳四照馬連錢。老人自怕情懷惡，強說風光勝去年。

乙酉二月一日偕爽秋鼎甫飲施均甫瞿子九學士王者香庶常沈子
培刑部四同年於陶然亭時均甫新自喀什葛爾至

攜酒郊原澣麴塵，寺樓鐘磬接城闌。曲江故事中和宴，絕塞新還汗漫人。雲冒遠山微
有雪，野含宿葦不能春。憑窗忽動烟波思，強擬風廊作釣輪。飲間有此語。

【校記】

「題」國稿本、越鐸本均作「試燈前夜招同書玉敦夫介唐桂卿四太史飲朱霞精舍燈月甚佳」。

題姚某伯燮龍女行雨圖四首

道光庚子五月，爲葉潤臣作。題曰「天龍自在珽

臺女」。

平章風月老如何？某伯嘗有小印曰「平章風月重事」。鯁壑蛟宮變幻多。欲借弄珠神女力，
略舒纖腕挽天河。

珍重微波屬柳郎，綠綈方寸淚沾裳。祇應薄倖人天恨，欲瀉銀河作斷潢。
爲恐金鉗誤衛公，不教夫婿御青驄。誰知十界花光雨，祇在雲鬢一笑中。

爭說青天騎白龍，欲乾海水見封禺。須臾一擲蓮驍影，多少星辰避電鋒。

揚州人程漱泉壽齡爲儀徵程定甫按察贊卿繪秋夜讀書圖中有洪

北江法梧門吳穀人山尊諸公題詩逸梧祭酒購得之屬補題圖右

吾生無嗜好，所營惟讀書。尤喜秋夜永，清風肅庭除。二尺短檠燈，世界照有餘。千秋賢智心，見此光明珠。不知窗外月，行到中天衢。祭酒夙好古，燁掌同艱劬。頻年往還熟，相勛窮五車。一朝得此畫，形神與之俱。詞林有成例，香茗非所需。蓬萊十萬軸，悉爲羣仙儲。二犬守不慎，遂屬金銀徒。程君起盛世，獨以勤學譽。馳街揚州邸，丹閣臨清渠。圖以嘉慶辛酉畫於菜市街揚州館之蒼屏樓，時按察尚未入館也。壬戌通籍後，洪、法諸君題詩。北江兩絕句，其一云：「半宵已有讀書聲，蓮漏參差出鳳城。帶得二分明月色，第三廳上數秋更。」詩不見集中。時聞篝火讀，弦歌出闌區。同時老尊宿，洪法偕二吳。一一留題字，銀鈎粲金壺。古歡紹孟晉，神契良非誣。終身官不恨，與此爲怡娛。我賃一椽屋，花樹長扶疏。開牖出花下，丹鉛映蟾蜍。惜無鐵華手，繪我秋聲圖。卷還致鄭重，勿爲寒具污。

【校記】

〔題〕國稿本、越鐸本「法梧門」均誤作「法吳門」。按，「法梧門」，乃法式善，所居名梧門書屋，故稱。

前圖中有吾鄉茹古香尚書茶題詩用史望之尚書致儼韻七古一首

茹公先曾祖同年友其詩文集無一字傳者誦之慨然再題二絕句

先德城南卷尚存，先曾祖有《柳陰課讀圖》，尚書題《滿園春》一詞，今尚存。寒家猶有作詩孫。可

憐下柴扶犁叟，指點荒祠說狀元。下柴，邨名。去余家西郭一里許，爲尚書舊居，其先祠綽楔猶在。

風誼師門重竹香，尚書尊人三樵先生，經學大師，先曾祖曾受業。竹香齋，先生文集名。綈袍一贈淚淋

浪。「記得年時，長安風雪，惟子能憐范叔寒」。尚書所題詞中語。無人更識三樵學，零落茶間帶草堂。

先生著《周易二問記》，假茶間、薑間爲主客之辭，皆自寓也。

桂卿同年疊山谷以雙井茶送子瞻詩韻連寄三章奉答二首

偶然秀水辭閑居，肘後戲繫青囊書。書來，言近爲人醫，甚忙。作詩時復挾天髓，玉女擎獻

雙寶珠。齊年同軫琴不孤，瑤櫺三錫錦不如。金風亭長世再見，夜夢花覆鴛鴦湖。

清漳夾宅中央居，一生不作絕交書。飲人清言勝醇酎，小搖臣鎖皆璣珠。我愧逐驥鞭

壁驢，君獨嗜痴謂鯁如。卻恐誤人東家某，笑指溝瀆當江湖。
君詩約閩中林二有編修過訪。

書憤四首

鑿空方乘貫月槎，無端海國幻蟲沙。未聞節制誅荀彘，虛報烽烟獲呂嘉。受拍已無金翅艦，解嘲猶託碧雲駝。可憐一片三山月，終古潮聲咽暮笳。

九朝屬國列朱吾，北戶聲靈戴斗樞。誰遣戍兵收蔡襲？頻傳捷奏出鮮于。黃龍清酒前盟在，文象金人兩地輸。喋血瘴鄉爭尺寸，班師連夜下銅符。

桓桓劉尚舊專征，推轂中朝恃重名。上幣犒師傾少府，巖疆唾手失邊城。蛟門秋老波濤惡，獅社風腥草木橫。請劍不行翻拜爵，漢家功罪總難明。

司農仰屋算經畝，布被清名出草萊。苦欲助軍尊卜式，先將失道罪王恢。東吳梗稻雲帆斷，北海芟薪澤雁哀。莫道誤人劉晏傳，須知程李亦奇才。
程李謂程異、李異。

再疊山谷以雙井茶送子瞻詩韻柬桐孫二首

詔蠻人犯罷都護，平涼尋盟視載書。君房一言棄三郡，不須神弩尤媚珠。藏舟於壑負

以趨，南暝北勃縱所如。波濤幸息鄉里福，我亦欲乞周官湖。

齊年趙岐長我歲，官貧聽鼓搏著書。每有佳獲輒示我，遂令寡人解衣珠。楊柳青青遍
津沽，河豚大上玉不如。招我東下相怡娛，飲水一勺知江湖。

【校記】

「罷」國稿本作「罪」。

「周官」國稿本作「周公」。

桐孫所寓地名雙井五疊前韻寄之

徑山呼龍治深汲，管涔有人開素書。君居井水所到處，想見潑茗浮乳珠。東坡調水不
用符，張陸醴泉焉得如？相從練帶懸薇壺，不復歸決回踊湖。

沈子培以怡邸凸花小箋索書疊山谷韻詩精絕可愛爲更作一詩六

疊前韻

桃花細鑿玉蠶紙，薑牙斜錯銀鈎書。文房持此慰飢渴，十賚可比一斛珠。押角豔奪紅
珊瑚，澄心秘造恐不如。我吟小詩出新意，濯之錦川花滿湖。

前日庚辰同年公謙孫駕部爲團司余屬其招樂部紫雲不至余亦以

小疾不往子培以爲恨七疊前韻調子培並戲駕部

軒后創傳素女圖，宣聖亦有房中書。近來坐部尚秦伎，漢皋空佩雙卵珠。

都下近演齣，以

秦晉來名西部者爲貴。黃州腔，出漢陽者，漸寥落矣。君家兄弟知好姝，當筵紫雲誰得如？玉蓮卻避

孫進士，妙常亦拒張于湖。

雜詠二首八九疊前韻

禮經徒被狗曲誚，春秋亦爲城旦書。王陽既乏點金術，牛衣致富由賣珠。讀破萬卷成專愚，翦張酒趙百不如。試握養魚經一冊，長擁如花游五湖。

島夷索虜鄙夷等，賊操盜備翻覆書。上京降冊拜臣構，蒜山詭報擒烏珠。自來出入紛主奴，大一統說久棄如。揆鷄竊位祖石碣，勃海名家首高湖。

坐中客言故明袁督師崇煥墓在右安門外草橋粵人旅葬處也粵士

夫歲以三月祭之感而賦此

百戰危疆捍九邊，長城自壞速亡年。信讒終歎思陵愎，易代重思聖主憐。千古奇冤埋獨柳，一抔旅邸託荒阡。同功同謚熊襄愍，寒食何人弔墓田？

酬施均甫酬予招飲之作三首十二疊前韻

讎也傳易受絕學，句也說詩廢故書。獨守西山一家集，飛仙自有光明珠。唐元和中，施肩

吾隱豫章西山，以爲十二真仙羽化之所，著詩名《西山集》。肩吾，字希聖，本睦州人，後遷武康。天山南北窮康居，

詩人游迹誰能如？探源真得星宿海，笑予局促誇鏡湖。

上馬殺賊下露布，何似仰屋窮著書？昆侖絕頂看日出，何似明堂賦火珠？幕府相依張大夫，杜陵嚴武遠不如。往還再涉蒲昌海，歸來濯足昆明湖。

冰山葱嶺入詩藁，朝雲花葉遲錦書。金門風月故無恙，坐中忽墮雙明珠。何戡米嘉今已無，文園病免愁相如。何時酒船櫂從子，道場山滿碧浪湖？

偶檢舊箋有字三行是數年前記寓廬花事約同人出游諸寺者因繫
以二十字柬書玉

不知人已老，未解惜花開。辜負閑官裏，年年春色來。

舊存半箋有無數花飛四字蓋昔年詞稿尾句也今日東風甚驟杏花
落盡桃李柳藥亦有零落日晚裴回樂枝紫丁香花下足成四十字
致敦夫西鄰館中

無數花飛處，巡檐弄扇行。牆低桃欲出，風軟柳能爭。夕照句留住，朱闌次第成。鄰
家詩思好，應爲晚霞生。時於東偏一院新添朱闌，未韻并調敦夫，寓人名也。

寓廬西院藤花小榭新添碧檻東偏小圃設紅闌一曲紀之以詩

君已休官去，牽船幾日留？朱闌妨草長，翠檻當花稠。小駐斜陽豔，能添曲徑幽。殷
勤補顏色，聊與度今秋。時已假滿一年。

【校記】

「妨草長」國稿本作「芳草長」，疑非。按，「妨草長」對下「當花稠」，「芳草」則失對。

庭中手植紅杏緋桃各一樹皆佳種也今春枯矣以詩惜之

絳杏無新萼，緋桃賸宿枝。穠華原易脆，吾意本無私。抱甕辛勤久，編籬宛轉持。白頭娛幾日？忍爾去芳時。

三月十五夜均甫招飲朱霞精舍

幾度逢三五，長安況寂寥。故人還絕塞，春月足今宵。酒爲當歌美，花憐近燭嬌。暫時烽火息，老病惜芳韶。

即事

路人指高柳，謂是子雲居。客少猶賒酒，童忙爲送書。雨晴驗憂樂，閑病自乘除。別有春風在，花藏一畝廬。